

欽  
定  
全  
唐  
文

欽定全唐文卷九十六目錄

新文藝出版社藏書

高宗武皇后二

令禮官詳定享明堂禮儀詔

明堂災手詔

封古元應妻爲徇忠縣君詔

授王元感太子司議郎詔

搜訪賢良詔

求訪賢良詔

五帝皆稱帝勅

僧道並重勅

停試糊名考判勅

減大理丞廢秋官獄勅

令武三思等修史勅

褒監察御史解琬勅

高宗天皇大帝哀冊文

改元光宅赦文

改元載初赦文

欽定全唐文卷九十六

高宗武皇后二

令禮官詳定享明堂禮儀詔

黃軒御歷朝萬方於合宮丹陵握符咨四岳於衢室有虞  
輯瑞總章之號既存大禹錫珪重屋之名攸建殷人受命  
置陽館以辨方周室凝圖立明堂以經野用能範圍三極  
幽贊五神展尊祖之懷申宗祀之典爰從漢魏迨及周隋  
經始之制雖興修廣之規未備朕以庸昧虔膺厚託受寄  
於綴衣之夕荷顧於仍几之前伏以高宗往年已屬意於

陽館故宗輔之縣預紀明堂之名改元之期先著總章之號朕於乾封之際已奉表上塵雖簡宸心未遑營構今以鼎郊勝壤圭邑奧區處天地之中順陰陽之序舟車是湊貢賦攸均爰藉子來之功式遵奉先之旨夫明堂者天子宗祀之堂朝諸侯之位也開乾坤之奧策法氣象之運行故能使災害不生禍亂不作眷言盛烈豈不美歟比者鴻儒禮官所執各異咸以爲明堂者置之三里之外七里之內在國陽明之地今旣俯邇宮掖恐黷靈祇誠乃布政之居未爲宗祀之所朕以爲丙巳之地去宮室遙遠每月所

居因時饗祭常備文物動有煩勞在於朕懷殊非所謂今故裁基紫掖闢宇彤闈經始肇興成之匪日但敬事天地神明之德乃彰尊祀祖宗嚴恭之志方展若使惟云布政負扆臨人則茅宇土階取適而已豈必勞百姓之力制九筵而御哉誠以獲執蘋蘩虔奉宗廟故也時旣沿革莫或相遵自我作古用適於事今以上堂爲嚴配之所下堂爲布政之居光敷禮訓式展誠敬來年正月一日可於明堂宗祀三聖以配上帝宜令禮官博士學士內外明禮者詳定儀禮務從典要速以奏聞

明堂災手詔

朕君臨紫極撫育蒼生普該有識之流爲啟無疆之福神  
宮之後式建尊容頃緣內作工徒宿火誤燒庥主遂涉明  
堂朕昧旦憂勤不遑寢食慮虧至道未副天心內省厥躬  
伏增寅畏槐省棘署衆僚庶尹宜竭廼誠各揚其職內作  
工匠可即放還刺史縣令風化之首宜矜恤鰥寡敦勸農  
桑均平賦役省察姦盜里閭妖訛尤當禁止遠近冤訟令  
早決斷見禁囚徒速爲處分老病之色征鎮之家亦令州  
縣加意撫存諸作非要切者量事宜停所司供進之物並

宜節減其長才廣度沈跡下僚據德依仁韜聲幽閉懷輔  
佐之器乏知己之容宜令京官職事五品以下及刺史上  
佐縣令量各準狀薦舉仍遣内外文武百官九品以上各  
上封事極言正議無有所隱

封古元應妻爲徇忠縣君詔

頃屬默啜攻城咸憂陷沒丈夫固守猶不能堅婦人懷忠  
不憚流矢由茲感激危城重安如不褒升何以獎勸古元  
應妻可封爲徇忠縣君

授王元感太子司議郎詔



王元感質性溫敏博聞強記手不釋卷老而彌篤倚前達之失究先聖之旨是謂儒宗不可多得可授太子司議郎兼崇賢館學士

搜訪賢良詔

鸞臺朕聞文武之道憑經緯而開國春秋之功藉生殺而成歲雖復車書混一中黃之雄氣諒存溫煦方滋太白之高星必應事既不昧理乃固然朕自臨御天下憂勞兆庶宵衣佇旦望調東戶之風旰食忘眠希緝南薰之化故得中外禔福遐邇乂安控蟠桃於滋穴之墟通細柳於炎洲

之域楚鋒越刃俱鑠大農之治俠客雄兒皆服鴻都之肆  
今若循其至理任彼無爲則取吏之道有餘止戈之義不  
足況金方起暴玉河未靖偷安揄鬼之鄉竊險麻奴之地  
然而北幽嚮化已事和親之禮而西璟負恩不習用師之  
備隨時之義寧可自然當土宇曠修人物繁富三門九地  
之祕豈謝前規白猿蒼兕之奇何慙曩烈或英謀冠代雄  
略過人總韓白以先驅掩孫吳而得雋或力能拔距勇絕  
蒙輪冒白刃其如歸搶蒼壁而不顧或迹隱鄜肆身託村  
間行雖犯於流俗器乃堪於拯難或捷如迅電走若追風

鬱弧則七札洞開奔陳則重圍自潰並有思於制命俱未  
遇於時須可令文武內外官五品及七品已上清官及外  
官刺史都督等於當管部內即令具舉且十室之邑忠信  
尚存三人同行我師猶在會須搜訪不得稱無薦若不虛  
自從褒異之典舉非其士豈漏貶責之科所司明爲條例  
布告遠近知朕意焉

求訪賢良詔

鸞臺上之臨下道莫貴於求賢臣之事君功豈踰於進善  
所以允凝庶績式靜羣方成大厦之凌雲濟巨川之沃日

故周稱多士著美風謠漢號得人垂芳竹素歷觀前代罔  
不由茲朕雖宵分輟寢日旰忘食勉思政術不憚劬勞而  
九域之至廣豈一人之獨化必佇材能共成羽翼雖復羣  
龍在位振鷺充庭仍恐屠釣或違邁軸尚隱未殫巖穴之  
美或委邱園之秀所以屢迴旌帛頻遣搜揚推薦之道相  
尋而虛佇之懷未愜永言於此寤寐以之宜令文武官五  
品以上各舉所知其有抱梁棟之才可以丹青神化蘊韜  
鈴之略可以振耀天威資道德之方可以獎訓風俗踐孝  
友之行可以勸率生靈抱儒素之業可以師範國胄蓄文

藻之思可以方駕詞人守貞亮之節可以直言無隱履清白之操可以守職不渝凡此八科實該三道取人以器求才務適所司仍具爲限程副朕意焉主者施行

五帝皆稱帝勅

天無二稱帝是通名承前諸儒互生同異乃以五方之帝亦謂天假有經傳互文終是名實未當稱號不別尊卑相混自今郊祀之禮唯昊天上帝稱天自餘五帝皆稱帝

僧道並重勅

老君化胡典誥攸著豈容僧輩妄請削除故知偏辭難以

憑據當依對定僉議惟允儻若史籍無據俗官何忍虛承  
明知化胡是真作佛非謬道能方便設教佛本因道而生  
老釋既自元同道佛亦合齊重自今後僧入觀不禮拜天  
尊道士入寺不瞻仰佛像各勒還俗仍科違勅之罪

### 停試糊名考判勅

品藻人物銓綜士流委之選曹責成斯在且人無求備用  
非一途理宜才地並昇輪轅兼採或收其履歷或取其學  
行糊名考判合格注官既乖委任之方頗異銓衡之術朕  
勵精思化仄席求賢必使草澤無遺方圓曲盡改弦易調

革故鼎新載想緝熙之崇式佇清通之效其常選人自今  
已後宜委所司依常例銓注其糊名入試及令學士考判  
宜停

減大理丞廢秋官獄勅

鸞臺崇德簡刑列辟之彝範并官省事有國之良圖聖人  
執契以乘時道苞乾大善政改絃而馭俗義叶鼎新朕虔  
荷先基恭臨下土運一心之淺慮憂四海之羣生馭朽載  
兢踐冰惟惕幸賴九元垂祐七廟宣靈天地以清風雨咸  
若菽粟登稔疆徼無虞茂祉日繁殊祥歲集答昊穹之睠

命順億兆之誠祈蒼壁靈壇展嚴禋於上帝黃金秘牒追  
顯號於前王大典聿申鴻符允暢斯實祖宗之遐慶函夏  
之多福豈朕虛薄能臻此乎但萬歲初元肇開昌厯九章  
恒憲甫釋嚴科遠近無縲紲之冤老幼有歌謠之樂人皆  
遷善政在維新丹筆刑官已絕埋梧之聽黃沙獄戶將爲  
鞠草之場而法禁之曹寮案斯衆司刑一局便有八丞旣  
罕囚徒靜無推案豈煩多士虛習夏書宜減二員俾從他  
職文昌國府建禮天闡庶政是歸具寮攸仰諒青縑之美  
地非赭服之攸居雖復時有申讞頗須聽斷兩造之文必



具五詞之理易窮詎假狴犴方甄枉直仙臺置獄甚爲非  
宜今欲總撤踈羅寧可別施圜圉其秋官獄即宜除毀朕  
旣深居秘宇不能遍覽縣區唯仗時賢共康天下州牧縣  
宰寄重親人僚守勾曹任惟綱紀百姓或有愆犯必須盡  
理推尋審知罪狀分明方可禁身科斷不得才聞小過遽  
繫園扉高下其心同叔魚之鬻獄輕重其手爽定國之平  
刑黥吏崇奸恣其乾沒要囚多滯積以炎涼有一於此當  
加重譴幸悉心而慎罰同底績於勝殘佇宏勿辟之規用  
闡無爲之化將使三千之罪永絕於當年豈惟數百之刑

僅寬於昔代布告天下識朕意焉

令武三思等修史勅

勅宜令三思與納言李嶠正諫大夫朱敬則司農少卿徐  
彥伯鳳閣舍人魏知古崔融司封郎中徐堅左史劉知幾  
直史館吳兢修唐史採四方之志成一家之言長懸楷則  
以貽勸誡

褒監察御史解琬勅

解琬孝性淳厚言詞哀切固辭強奪之榮乞就終憂之典  
足以激揚風俗敦獎名教宜遂雅懷仍其祈請仍俟服闋

大帝哀冊文

癸未十二月甲寅朔四日丁巳大行天  
貝觀殿殯於乾元殿之西階粵以文明  
十五日景申發自瀍洛旋於鎬京以其  
一日庚寅將遷座於乾陵禮也曉霧收

不其言曰

月瑤誕慶雲邱降祥仙源漢  
騰光鳥庭開象龍德含章六  
韜光齒冑綴玉詞條緝瓊文  
敦敏量本䟽通賓門表譽納  
欽定全唐文

卷九十六

武皇

夏余欽德周誦傾風粵自銅  
荆泳淳化有敷至仁無競教  
六羽昇年西雲應呂南風散  
旌士焚林蓋賢濬明上格財  
戒盈茅宇蠲奢土砌衢室裡  
嗣明禮崇殷夏樂盛咸英時

侵瞻白雲而茹泣望蒼野而摧心愴遊冠之日遠哀墜劒  
之年深淚有變於湘竹恨方纏於穀林念茲孤幼哽咽荒  
襟腸與肝而共斷憂與痛而相尋顧慕丹楹迴環紫掖撫  
眇嗣而傷今想宸顏而慟昔寄柔情於簡素播天聲於金  
石其詞曰

月瑤誕慶雲邱降祥仙源漢遠聖緒天長繞樞飛電麗室  
騰光鳥庭開象龍德含章六藝生知四聰神授晦迹登序  
韜光齒冑綴玉詞條緝瓊文囿發揮綠錯牢籠紫宙鑑符  
敦敏量本疏通賓門表譽納麓彰功始潛朱邱或躍青宮

層城務簡通三神凝得一元池肆賞青邱佇逸訪道順風  
養真乘日拜牧襄野尊師石室寶獻河宗賁歸王會浮羣  
交影飛輪繫軼雲封薦款日觀申虔告成七廟歸功九天  
無事無爲爰遊爰豫胥域延想汾川滌慮儀鳳巢阿飛麟  
在馭火林歸朔燭鄉移曙所冀元壽齊年紫皇祿興旅館  
災纏未央遽脫屣於宸極奄乘雲於帝鄉亘天維而落構  
匝日寓而沈光殉百身而靡贖積萬古而徒傷魂銷志殞  
裂骨抽腸受玉几之遺顧託寶業於窮荒嗣君孝切諒闇  
居喪集大務於殘喘積衆憂於未亡所以割深哀而克勵

力迷衿而自強嗚呼哀哉浹埏過密縣區縞素恨鈞天之  
不歸瞻鼎湖以凝慕嗚呼哀哉攀聖滋遠戀德滋深訴昊  
穹而雨泗擗厚載而崩心泣人靈而灑悲霰晦宇宙而起  
愁陰嗚呼哀哉緹琯移序朱明應律蛩寤方營龜謀獻吉  
背九洛而移馭徠八川而從蹕列壁羽之逶迤動鍾挽之  
蕭瑟顧園邑之蒼翠望巖隧之紆鬱喬陽之爲不追茂陵  
之書方出嗚呼哀哉跡圖懸圃神降長流去重陽之奕奕  
襲大夜之悠悠同霸瑩之薄寔契紀塵而莫修思門山於  
夕月悲隴樹於新秋嗚呼哀哉想軒駕之攀龍思龔山之

戀鳳矧承眷於先房誓牽毀而哀送豈謂務切至綦事違  
深恫仍徇公而抑已遂奪情以從衆悲千罔極之悲痛萬  
終天之痛嗚呼哀哉恭惟聖烈實鏤微衷敬因彤管載撰  
元功業彌遙而道彌著時益遠而聲益隆播二儀而不極  
橫四海而焉窮嗚呼哀哉

改元光宅赦文

鸞臺朕聞上皇建極體元氣以育羣生大聖承天法開陽  
而陶庶類與時舒卷叶三正而推移隨道污隆應五鈐以  
通變故能牢籠宇宙埏埴人靈符景運而財成契休期以

光宅昔有隋標季率土淪胥豺狼肆吞噬之災億兆被虔  
劉之酷高祖神堯皇帝披圖汾水仗鉞參墟廓氛稷而安  
四維掃欒槍而清六合太宗文武聖皇帝負日月而膺運  
鼓雷霆以震威蕩海夷山功浹八荒之外救災拯溺仁霑  
萬域之表樂和禮洽天平地成茂績光於遂初鴻名冠於  
開闢高宗天皇大帝雲房誕睿虹渚降靈受綠錯之禎符  
應朱紱之景命飛車乘毳臣軒頊之不臣沒羽浮金服禹  
湯之未服所以開邊服遠更闡寓於先基富貴寧人重增  
輝於前列撫璇當宁調五氣於明堂考瑞升中朝百神於



日觀茫茫衆俗寧知覆燾之恩蠢蠢庶氓孰辨陶甄之力  
固已千年啟旦三聖重光厯選前書無聞往載豈謂道隆  
金鏡運迫鼎湖方延翠渚之祥遽託白雲之駕以社稷之  
大任屬荒眇之微躬欽奉遺言載深悲懼遂以茲菲德開  
導嗣王式綜萬幾載宣風化所賴王公卿士各竭乃誠若  
濟巨川實資舟楫然自恭臨朝序已積炎涼教靡致於易  
風道尚慚於變俗良以哀迷在疚荼棘纏心陵廟未安匪  
遑專慮今者鳳京遙踐龍馭上升旣因大禮之終宜更中  
區之始朕居臨赤縣求瘼之志每盈子育蒼生恤隱之懷

鎮切惟欲勵精爲政克己化人使宗社固北辰之安區寓  
致南風之泰以斯酬眷命用此報先恩冀上不負於尊靈  
下微申於至懇夫五行遞用列代相承欲崇其德先遵所  
尚故夏以金運乘驪而尚元周以火行貴駢而尚赤將隆  
母德必欲子扶近者地不藏珍山無祕寶皇家土德勝氣  
彌彰宜從白賁之象以輔黃中之運自今以後旗幟皆從  
金色仍飾之以紫畫以雜文其應合改者所司詳依典故  
供奉帷幙咸用紫色自錄府衛所旗並改以阜八品已下  
舊服青者並改以碧其在京諸司文武職事五品已上清

官并六品七品清官並每日入朝之時常服袴褶諸州縣長官在公衙亦準此自餘官朔望朝參皆依舊其色皆依本品又鎮星之在太微已厯年載著土精之美應表坤祚之元符宜同感帝以時薦享又東都改爲神都官名太初官但列署分司各因時而立號建官置職咸適事以標名而今曹僚之中稱謂多爽宜改尚書省爲文昌臺左僕射爲文昌左相右僕射爲文昌右相吏部尚書爲天官尚書戶部尚書爲地官尚書禮部尚書爲春官尚書兵部尚書爲夏官尚書刑部尚書爲秋官尚書工部尚書爲冬官尚

書門下省改爲鸞臺中書省改爲鳳閣侍中改爲納言中書令改爲內史太常寺改爲司禮寺鴻臚寺改爲司賓寺宗正寺改爲司屬寺光祿寺改爲司膳寺太府寺改爲司府寺太僕寺改爲司僕寺衛尉寺改爲司衛寺大理寺改爲司刑寺農寺依舊左右衛亦依舊左右驍衛爲左右武衛左右武衛爲左右鷹揚衛左右威衛爲左右豹韜衛左右領軍衛爲左右玉鈐衛左右金吾衛依舊其餘曹司及官僚名未改者所司速制名奏聞又司隸之官監郡之職所以巡省風俗刺舉愆違今人物殷煩區宇遐曠而所在

州縣未能澄肅可制右肅政御史臺一司其職員一準御史臺專知諸州按察其舊御史臺改左肅政御史臺專知在京有司及監諸軍旅并出使其諸州縣事參軍宜依舊令在京五品已上清官每日章善顯福等門各一人待詔朕當親訪政道詳求得失又元元者皇室之源韞道德而無爲冠靈仙而不測業光衆妙仁覃庶品豈使寶允見御宸居先母竟無尊位可上尊號曰先天太后宜於老君廟所敬立尊像以申誠薦又洛州界內所有帝王之陵及自古清直之臣忠廉之佐並令州縣就其塋域一申致享又

自武德以來元勲佐命或以忠鯁事主或以道德匡君非  
身在有犯緣子孫絕封者前詔雖已處分或恐仍有闕遺  
宜降霈澤重申前命又往日先朝聖武蕩定遐方日月照  
臨咸爲郡縣皆荷生成之惠無復遠近之殊朕矜撫之懷  
豈隔中外每念其後嗣愍愴良深繼絕興亡實爲本志各  
宜求其後允立之以承享獻其諸都護漢官及鎮兵等並  
悉放還其營奉山陵使及鹵簿使等並依別勅處分又兩  
京之所徭賦實繁亦令所司作優量法使勞逸得所靈駕  
所涉千里斯遞在路黎甿莫不哀奉念其勞弊情增感惻

其緣供頓及山陵者並免今年課稅又比來諸道軍行敘  
勲多濫或端居不出以貨買勲真偽相蒙深爲巨蠹自今  
以後所司宜明具條例務令禁斷責成斯在可不勉歟如  
更有違必越法科處分又比命放出宮女已降詔書然以  
在內多時咸悉願住但念其各有親屬豈可久致分離宜  
準前恩即令放出又隆平日久戶口滋多物務旣煩欺隱  
斯衆其上州三萬戶已上大縣萬戶已上各宜析出別置  
州縣惟雍洛二州不在此限又濟時之道求賢是務其官  
人及百姓等或器標瑚璉材堪棟幹或在職清慎或抱德

欽定全唐文

卷九十六

武皇后

五

幽棲或武藝馳聲或文藻流譽宜令京官九品已上諸州  
長官各舉一人咸以名薦務取得賢之實無貽濫吹之譏  
又前者有詔具述内外官寮備陳行事以申勸沮但恐百  
官在職尚有虧違今欲重降深恩更垂寬宥棄瑕錄用罔  
責於前非滌罪論功必期於後善若又不悛已過重掛踈  
羅當使置以嚴刑倍加其罰思與士庶共此維新可大赦  
天下改文明元年爲光宅元年自九月五日昧爽已前大  
辟罪已下罪無輕重已發覺未發覺已結正未結正見繫  
囚徒皆赦除之流人未達前所者放還其犯十惡官人枉



法受財監臨主守自盜所監臨劫賊殺人故殺人謀殺人  
反逆緣坐并軍將臨戎挫威喪律鎮遏失所虧損師徒及  
常赦所不免者並不在赦內亡官失爵量加收敘諸年八  
十已上各賜粟二石綿帛二段九十已上賜粟三石綿帛  
三段百歲已上賜粟五石綿帛五段並依舊例版授孝子  
順孫義夫節婦咸表門閭鰥寡惇獨篤疾之徒不能自存  
者並加賑恤亡命山澤挾藏軍器百日不首復罪如初敢  
以赦前事相告言者以其罪罪之布告天下咸使聞知其  
詔書內事有未盡者仍令所司作條例處分

改元載初赦文

朕聞元皇纂歷則天地以裁規大聖握圖法陰陽以施化  
故能牢籠品類陶鑄生靈敷景運於休期闡宏基於光宅  
昔有隋失馭率土分裂赤縣爲禾黍之場蒼生遇塗炭之  
酷我高祖神堯皇帝龍興汾晉鳳起襄區除梟獍而安八  
荒翦鯨鯢而清四海太宗文武聖皇帝膺昊穹之歷數鼓  
雷電之雄威服遠冠巢燧之前開邊越義農之際鴻名邁  
於三五茂績隆於往初高宗天皇大帝稟雷澤之禎符降  
天縱之神器湛恩所被匝乾坤覆載之鄉至化所覃盡舟

車所通之境撫璇丹極輯瑞蒼巖天平地成淳風啟千年  
之運樂和禮備寶祚隆三聖之基逖聽王猷熙開帝載朕  
以虛薄虔奉睿圖夙懷兢業不遑暇食幸穹昊貽佑宗社  
延祥河薦合天之符洛出永昌之籙時和歲稔遠肅邇安  
斯皆先德所延屢彰嘉貺自恭臨億兆已積炎涼尚想希  
風未臻於至道顧循菲德媿切於深衷思宏顧託之恩再  
闡混元之始夫以元穹列象三辰所以麗天厚載含章五  
行於焉紀地易曰三五以變錯綜其數通其變遂成天下  
之文極其數遂定天下之象火水相變其卦爲革彖曰天

地革而四時成言五德更相生變革萬象故帝者改政施教明受之於天不定之於人者也仲尼曰其或繼周者雖百代可知蓋以文質相因法度相改故矣是以伏羲高陽有周皆以建子之月爲正神農少昊陶唐有殷皆以建丑之月爲正軒轅高辛夏后漢氏皆以建寅之月爲正後雖百代可知者以此雖遭遇不同步驟殊致未有不表明軌物以章靈命之符者也我國家創業嘗有意改正朔矣所未改者蓋有由焉高祖草創百度因循隋氏太宗緯地經天日不暇給高宗嗣厯將宏丕訓改作之事屢發聖謨言

猶在耳永懷無及自五帝續統三王馭宇或父子相承同  
體異德或金木迭改應天順人故納麓登庸粵受終於文  
祖干戈革命必理厯於明時然則開元配永肇自陽來之  
旦統厯履端基於朔易之首孳萌發內氣律由中品物任  
而昭蘇生類蕩而敷革是知夏之人統不逮殷之地正殷  
之地正有殊周之天統元命所苞實在茲矣周公稽古制  
禮於成王之日漢高握德改元於武皇之代則知文物大  
備未遑於上業損益之道諒屬於中平朕所以式遵禮經  
奉成先志今推三統之次國家得天統當以建子月爲正

考之羣藝厥義昭矣宜以永昌元年十有一月爲載初元年正月十有二月改臘月來年正月改爲一月自載初元年正月一日子時已前大辟罪已下罪無輕重已發覺未發覺已結正未結正見繫囚徒皆赦除之其叛逆緣坐及子孫殺祖父母父母父母部曲容姦奴婢殺主不在赦限其與敬業虺冲并諸虺友往還其魁首已伏誅其支黨事未發者特從原免不得更相告言内外見任文武九品已上職事官並賜爵一級天下百歲已上老人版授下州刺史米粟五石帛十段九十已上版授上州司馬米粟四石帛七

段八十已上版授縣令逋懸調并丁夫雜匠衛士及有番  
第等違番及逃走應陪番及徵課調者並特宜免放其欠  
負官物及盜詐三庫物並不在赦限鰥寡孤獨篤疾等不  
能存立者量加賑恤孝子順孫義夫節婦旌表門閭終身  
勿事天下百姓年二十一身爲戶頭者各賜爵一級女子  
百戶賜以牛酒明堂役工人未被恩者付所司即類例定  
等級奏聞十五日內使了緣供明堂致死人其有未霑勲  
賜者亦宜準例酬給今年麥不熟處及遭霜澇之處並量  
放庸課州縣好加檢校勿使饑饉及新平軍差科百姓稍

有辛苦宜亦量加優恤蠲其徭役所司類例處分供象州軍百姓艱辛處未得復者宜給復一年洛州輦轂徭役繁多代朔并忻等州行軍及諸州供明堂木及銅處所司各類例節級給復皇親諸陪位未出身者量材處分已出身者賜勲一轉富商大賈衣服過制喪葬奢侈損廢生業州縣相知捉搦兩京兼委金吾檢校天下百姓皆須嫁娶以時勿使外有曠夫內有寡女戰亡人格外贈勲兩轉迴授其親其子孤惻者州縣給糧安養征鎮人家口州縣存恤勸課殷有之家助其營種勿使外人侵欺仍令所司刊正



禮樂刪定律令格式不便於時者內外官五品已上各舉所知九經文字集學士詳正革其訛舛亡官失爵量加敘錄長流人別勅流人移貫人降授官人及後緣逆人用當及造罪過特處分者雖未至前所並不在赦限西府功臣及晉府子孫屈滯者量加收敘所司奏聞亡命山澤挾藏軍器百日不首復罪如初敢以赦前事相告言者以其罪罪之率土之內賜酺三日赦書日行五百里朕又聞之人必有名者所以吐情自紀尊事天人是故以甲以乙成湯爲子孫之制有類有象申繻明德義之由朕今懷柔百神

對揚上帝三靈眷祐萬國來庭宜膺正名之典式敷行政  
之方朕宜以墨爲名自卦演龍圖文開鳥跡萬人以察百  
工以乂所以宏敷政道宣明禮樂指事會意改易異塗轉  
注象形屈伸殊制周宣博雅史籀興古篆之文尼父溫良  
邱明述春秋之傳自諸侯力爭姬室寢微離爲二周分成  
七國律法異令田疇異畝言語異聲衣冠異制秦兼天下  
剋滅古文隸卒屢興兵車歲動官獄繁驚爰創隸書自著  
秦文肇興八體刻符兼於大篆摹印逮於及書兩漢因之  
九千餘字張敞杜鄴講學於前揚雄甄豐校理於後魏晉

以降代乏名儒穿鑿多門形聲轉繆結造新字附會其情  
古今訛舛稍益繁布畫規無端平之體魚鳥增奔放之容  
轉相倣效日滋日甚遂使後生學徒罔知所據先王載籍  
從此湮沈言念澆漓情深憫悼思返上皇之化佇移季葉  
之風但習俗多時良難頓改特創制一十二字率先百辟  
上有依於古體下有改於新文庶保可久之基方表還淳  
之意昔在包犧開木德之運軒轅應土行之序循環終始  
布在方策莫不績著帝猷功宣皇道方列三微之統乃膺  
五行之歷雖則盛比共工強踰嬴政齊桓晉文之業大彭

豕韋之美纔爲霸者豈登帝籙自炎精蕩覆王風哀思漢氏蒙塵中原離析當塗逆取但肆兵威典午專權無聞德化故三國鼎峙五胡幅裂或道乖嗣德或業匪孫謀良由取之不以樂推失之在乎虐用者也及齊梁竊據僻在江淮周魏勃興奄宅咸洛雖變夷從夏號令惟行於境內而智小謀大聲教不通於天下隋之御極陳氏猶存開皇之中纔聞混一嗣主失道俄至分崩七八年間生人泯絕秦項之酷猶未之半開闢已來蓋未之有我國家祖宗積德文武重光仁風被於四表英猷冠於三代易不云乎天地

之道恒久而不易者也仲尼曰善人爲邦百年可以勝殘  
去殺則知聖王久於其道而天下化成矣自魏至隋年將  
四百稱皇僭帝數十餘家莫不廢王道而立私權先詐力  
而後仁義勲未踰於列國德不慚於霸圖雖復時合諸侯  
一匡區域晉武踐祚茂烈多慚於水官隋帝乘時雄圖不  
逮於秦氏惟彼二君閏位況區區者豈宜當三統之數者  
乎朕逖聽皇綱幽求帝典定王霸之眞僞洗生人之耳目  
庶叶三推之美光宣五帝之次況當布政景化維新太初  
開歷上元伊始宜以發揮大寶申明歷數恢皇家正土之

符繼炎劉真火之序摘之罔極垂之無窮以周漢之後爲  
二王仍封舜禹成湯之裔爲三恪所司求其苗裔即加封  
建其周隋宜同列國其嗣使主祭焉布告遐邇咸知朕意  
主者施行

欽定全唐文卷九十七目錄

高宗武皇后 三

請親祭地祇表

請父在爲母終三年服表

勞姚璿璽書

諭劉仁軌璽書

勞婁師德書

賜少林寺僧書

賜胡洞真天師書

方廣大莊嚴經序

大周新譯大方廣佛華嚴經序

三藏聖教序

夏日遊石淙詩序

新譯大乘入楞伽經序

臣軌序

乾陵述聖記

織錦迴文記



欽定全唐文卷九十七

高宗武皇后 三

請親祭地祇表

伏尋登封之禮遠邁古先而降禪之儀竊爲未允其祭地祇之日以太后昭配至於行事皆以公卿以妄愚誠恐未周備何者乾坤定位剛柔之義已殊經義載陳中外之儀斯別瑤壇作配旣合於方祇玉豆薦芳實歸於內職況推尊先后親饗瓊筵豈有外命宰臣內參禋祭詳於至理有紊徽章但禮節之源雖興於昔典而升降之制尚缺於遙

圖且往代封獄雖云顯號或因時省俗意在尋仙或以情  
覬名事深爲己豈如化被乎四表推美於神宗道冠乎二  
儀歸功於先德寧可仍遵舊軌靡創彝章妄謬處椒闥叨  
居蘭掖但以職惟中饋道屬於烝嘗義切奉先理光於蘋  
藻罔極之思載結於因心祇肅之懷實深於明祀但妄早  
乖定省已闕侍於晨昏今屬崇禋豈敢安於帷帟是故馳  
情夕寢睠羸里而翹魂疊慮宵興仰梁郊而聳念伏望展  
禮之日總率六宮内外命婦以親奉奠冀申如在之敬式  
展虔拜之儀積此微忱已淹氣序旣屬鑾輿將警奠璧非

賒輒效丹心庶裨大禮冀聖朝垂則永播於芳規螢燭末  
光增輝於日月

請父在爲母終三年服表

夫禮緣人情而立制因時事而爲範變古者未必是循舊  
者不足多也至如父在爲母服止一朞雖心喪三年服由  
尊降竊謂子之於母慈愛特深非母不生非母不育推燥  
居濕咽苦吐甘生養勞瘁恩斯極矣所以禽獸之情猶知  
其母三年在懷理宜崇報若父在爲母服止一朞尊父之  
敬雖周報母之慈有闕且齊衰之制足爲差減更令周以

一暮恐傷人子之志今請父在爲母終三年之服

勞姚璿璽書

夫嚴霜之下識貞松之擅奇疾風之前知勁草之爲貴物  
既有此人亦宜哉卿早荷朝恩委任斯重居中作相宏益  
已多防邊訓兵心力俱盡歲寒無改終始不渝迺眷蜀中  
毗俗殷雜久缺良守敝於侵漁政以賄成人無厝足是用  
命卿出鎮寄茲存養果能攬轡澄清下車整肅吏不敢犯  
姦無所容前後糾擿蓋非一緒貪殘之伍屏跡於列城剽  
奪之儔遁形於外境詎勞暮月康此黎元言念德聲良深

嘉尚宜布瑯邪之化當以豫州爲法

喻劉仁軌璽書

今以皇帝諒闇不言眇身且代親政遠勞勸誠復表辭衰  
疾惓望旣衰徊徨失據又云呂后見嗤於後代祿產貽禍  
於漢朝引喻良深愧慰交集公忠貞之操終始不渝勁直  
之風古今罕比初聞此語能不惘然靜而思之是爲龜鏡  
且端揆之任儀刑百辟況公先朝舊德遐邇具瞻願以匡  
救爲懷無以暮年致請

勞婁師德書

卿素積忠勤兼懷武略朕所以寄之襟要授以甲兵自卿受委北陞總司軍任往還靈夏檢校屯田收率旣多京坻遽積不煩和糴之費無復轉輸之艱兩軍及北鎮兵數年咸得支給勤勞之誠久而彌著覽以嘉尚欣悅良深

賜少林寺僧書

暑候將闌炎序彌溽山林靜寂梵宇清虛宴坐經行想當休愈弟子前隨鳳駕過謁鷲巖觀寶塔以徘徊覩先妃之淨業薰修之所猶未畢功一見悲驚萬感兼集攀光寶樹載深風樹之哀弔影珠泉更積寒泉之思弟子自惟薄祐

鎮切紉懷每屆秋期倍軫摧心之痛炎涼遞運逾添切骨  
之哀未極三旬頻鍾二忌恨乘時而更恨悲踐露而逾悲  
惟託福田少申荒思今欲續成先志重置莊嚴故遣三思  
賁金絹等物往彼就師平章幸識斯意即務修營望及諱  
辰終此功德所冀罄斯誠懇以奉津梁稍宣資助之懷微  
慰紉迷之緒略書示意指不多云

賜胡洞真天師書

先生道位高尚早出塵俗如軒歷之廣成漢朝之河上遂  
能不遠千里來赴三川日御先開望霓裳之漸遠天津後

渡瞻鶴蓋以方遙空睇風雲惆悵無已儻蒙九轉之餘希遺一丸之藥

方廣大莊嚴經序

朕聞真空無象非象教無以譯其真實際無言非言緒無以詮其實是以龍宮法鏡圓照匝於三千驚嶺元門方廣周於百億師無師之智必藉修多學無學之宗終資祇夜自金人感夢寶偈方傳貝葉靈文北天之訓逾遠貫華微旨西秦之譯更新大乘小乘逗根機而演教半字滿字逐權實而相曉叡唐御寓載叶昌期代傳三聖年將七十舜



河與定水俱清堯燭與慈燈並照緇衣西上寧惟法顯之  
流白馬東來豈直摩騰之輩大宏釋教諒屬茲辰朕爰自  
幼齡歸心彼岸務廣三明之路思崇八正之門往者夙構  
閔凶遽違嚴蔭近以孝誠無感復背慈顏露草之恨日深  
風樹之悲鎮切凡是二親之所蓄用兩京之所舊居莫不  
總結招提之宇咸充無盡之藏仍集京城大德等凡有十  
人共中天竺國三藏法師地婆訶羅於西太原寺同譯經  
論法師等並業隣初地道駕彌天爲佛法之棟梁乃慧海  
之舟楫前後翻譯凡有十部以垂拱元年歲次大梁月旅

夷則汗青方就裝縹畢功甘露之旨旣深大雲之喻方遠  
庶永垂沙劫廣濟塵區傳火之義自明瀉瓶之辯逾潤朕  
以虛昧欽承顧託常願紹隆三寶安大寶之鴻基發揮八  
聖固先聖之丕業所以四句微言極提河之深致一音妙  
義盡庵園之奧旨擊大法鼓響振於無間吹大法螺聲通  
於有頂爲閭室之明炬實昏衢之慧月菩提了義其在茲  
乎部帙條流列之於後

大周新譯大方廣佛華嚴經序

蓋聞造化權輿之首天道未分龜龍繫象之初人文始著

雖萬八千歲同臨有截之區七十二君詎識無邊之義由  
是人迷四忍輪迴於六趣之中家纏五蓋沒溺於三途之  
下及夫驚巖西峙象駕東驅慧日法王超四大而高視中  
天調御越十地以居尊包括鐵圍延促沙劫其爲體也則  
不生不滅其爲相也則無去無來念處正勤三十七品爲  
其行慈悲喜捨四無量法運其心方便之力難思圓對之  
機多緒混太空而爲量豈算數之能窮入纖芥之微區匪  
名言之可述無得而稱者其唯大覺歟朕曩劫植因叨承  
佛記金山降旨大雲之偈先彰玉宸披祥寶雨之文後及

加以積善餘慶俯集微躬遂得地平天成河清海晏殊祥  
絕瑞旣日至而月書貝牒靈文亦時臻而歲洽踰海越漠  
獻賅之禮備焉架險航深重譯之詞罄矣大方廣佛華嚴  
經者斯乃諸佛之密藏如來之性海視之者莫識其指歸  
挹之者罕測其涯際有學無學志絕窺覷二乘三乘寧希  
聽受最勝種智莊嚴之跡旣隆普賢文殊願行之因斯滿  
一句之內包法界之無邊一毫之中置刹土而非隘摩竭  
陀國肇興妙會之緣普光法堂爰敷寂滅之理緬惟奧義  
譯在晉朝時踰六代年將四百然一部之典纔獲三萬餘

言唯啟半珠未窺金寶朕聞其梵本先在于闐國中遣使  
奉迎近方至此既覩百千之妙頌乃披十萬之正文粵以  
證聖元年歲次乙未月旅姑洗朔惟戊申以其十四日辛  
酉於大徧空寺親受筆削敬譯斯經遂得甘露流津預夢  
庚申之夕膏雨灑潤後覃壬戌之辰式開實相之門還符  
一味之澤以聖歷二年歲次己亥十月壬午朔八日己丑  
繕寫畢功添性海之波瀾廓法界之疆域大乘頓教普被  
於無窮方廣眞詮遐該於有識豈謂後五百歲忽奉金口  
之言娑婆界中俄啟珠函之祕所冀闡揚沙界宣暢塵區

並兩曜而長懸彌十方而永布一窺寶偈慶溢心靈三復  
幽宗喜盈身意雖則無說無示理符不二之門然因言顯  
言方闡大千之意輒申鄙作爰題序云

三藏聖教序

蓋聞大乘奧典光秘蹟於瓊編三藏元樞著靈文於寶偈  
斯乃牢籠繫象演暢幽深雖第一義空名言之路雙絕諸  
法無相聽說之理兼忘然則發啟善根實資開導宏宣妙  
旨終寄顯揚至若鹿野初開儼尊容於常住龍宮載闢緘  
舍利於將來所以地涌全身爲證說經之兆空懸寶殿爰

標闡法之微八萬四千分布閻浮之境三十六億莊嚴平等之居敷演一音則隨類而解廣陳三句則劫壽難窮自夜掩周星宵通漢夢玉毫流彩式彰東漸之風金口傳芳遂覩後秦之譯修多祇夜之秘躅因緣譬喻之要宗授記之與本生方廣之與論議雖立名差別而究理不殊同歸實相之源並湊涅槃之會朕幼崇釋教夙慕歸依思欲運六道於慈舟迴超苦海驅四生於彼岸永離蓋纏窮貝牒之遺文集蜂臺之秘籙今於大福先寺翻譯院所更譯斯經所言入定不定印經者此明退不退之心前二後三雖

有遲速如來設教同趣菩提旣顯神咒之功莊嚴最上爰  
述下生之記說法度人三藏法師義淨等並緇俗之綱維  
紺坊之龍象德包初地道輔彌天光我紹隆之基更峻住  
持之業以久視元年歲次庚子五月五日繕寫畢功重開  
甘露之門方布大雲之蔭所冀芥城數極鳥筆猶傳拂石  
年窮樹經無泯宏濟覃於百億遷拔被於恒沙部帙條流  
列之於左

夏日遊石淙詩序

若夫圓嶠方壺涉滄波而靡際金臺玉闕陟縣圃而無階



唯聞山海之經空覽神仙之記爰有石淙者即平樂澗也  
爾其近接嵩嶺俯屆箕峯瞻少室兮若蓮睇潁川兮如帶  
既而躡崎嶇之山徑蔭蒙密之藤蘿洶湧洪湍落虛潭而  
送響高低翠壁列幽澗而開筵密葉舒帷屏梅氛而蕩燠  
疏松引吹清麥候以含涼就林藪而王心神對煙霞而滌  
塵累森沈邱壑即是桃源淼漫平流還浮竹箭紉薜荔而  
成帳聳蓮石而如樓洞口全開溜千年之芳髓山腰半圻  
吐十里之香粳無煩崑閬之游自然形勝之所當使人題  
綵翰各寫瓊篇庶無滯於幽栖冀不孤於泉石各題四韻

咸賦七言

新譯大乘入楞伽經序

蓋聞摩羅山頂旣最崇而最嚴楞伽城中實難往而難入  
先佛宏宣之地曩聖修行之所爰有城主號羅婆那乘宮  
殿以謁尊顏奏樂音而祈妙法因鬘峯以表興指藏海以  
明宗所言入楞伽經者斯乃諸佛心量之元樞羣經理窟  
之妙鍵廣喻幽旨洞明深意不生不滅非有非無絕去來  
之二途離斷常之雙執以第一義諦得最上妙珍體諸法  
之皆虛知前境之如幻混假名之分別等生死於涅槃大

慧之間初承法王之旨斯發一百八義應實相而離世間  
三十九門破邪見而宣正法曉名相之並假祛妄想之迷  
衿依正智以會如如悟緣起而歸妙理境風旣息識浪方  
澄三自性皆空二無我俱泯入如來之藏遊解脫之門原  
此經文來自西國至若元嘉建號跋陀之譯未宏延昌紀  
年流支之義多舛朕虔思付囑情切紹隆以久視元年歲  
次庚子林鍾紀律炎帝司辰於時避暑箕峯觀風潁水三  
陽宮內重出斯經討三本之要詮成七卷之了教三藏沙  
門于闐國僧實又難陀大德大福先寺僧復禮等並名追

安遠德契騰蘭襲龍樹之芳猷探馬鳴之祕府戒香與覺  
花齊馥意珠共性月同圓故能了達沖微發揮奧蹟以長  
安四年正月十五日繕寫云畢自惟菲薄言謝珪璋顧四  
辯而多慙瞻一乘而罔測難達緇俗之請強申翰墨之文  
詞拙理乖彌增愧慙伏以此經微妙最爲希有所冀破重  
昏之暗傳燈之句不窮演流注之功湧泉之義無盡題目  
品次列於後云

臣軌序

軌一作範

蓋聞惟天著象庶品同於照臨惟地含章羣生等於亭育

朕以庸昧忝位坤元思齊厚載之仁式罄普覃之惠迺中  
迺外思養之志靡殊惟子惟臣慈誘之情無隔願申殫懇  
上翊紫機爰洎衆僚聿匡元化伏以天皇明逾則哲志切  
旁求簪裾總川岳之靈珎珮聚星辰之秀羣英莅職衆彥  
分司足以廣扇淳風長隆寶祚但母之於子慈愛特深雖  
復已積忠良猶且思垂勸勵昔文伯旣達仍加喻軸之言  
孟軻已賢更益斷機之誨良以情隆撫字心欲助成比者  
太子及王已撰修身之訓羣公列辟未敷忠告之規近以  
暇辰遊心文府聊因煒管用寫虛襟故綴敘所聞以爲臣

軌一部想周朝之十亂爰著十章思殷室之兩臣分爲兩  
卷所以發揮德行鎔範身心爲事上之軌模作臣下之繩  
準若乃遐想緜載眇鑒前修莫不元首居尊股肱宣力資  
棟梁而成大厦憑舟楫而濟巨川唱和相依同功共體然  
則君親旣立忠孝形焉奉國奉家率由之道寧二事君事  
父資敬之途斯一臣主之義其至矣乎休戚是均可不深  
鑒夫麗容雖麗猶待鏡以端形明德雖明終假言而榮行  
今故以茲所撰普錫具僚誠非筆削之工貴申裨道之益  
何則正言斯重元珠比而尚輕異語爲珍蒼璧喻而非寶

是知贈人以財者唯申即目之歡贈人以言者能致終身之福若使佩茲箴戒同彼韋弦修己必顧其規立行每觀其則自然榮隨歲積慶與時新家將國而共安下與上而俱泰察微之士所宜三思庶照鄙誠敬終高德凡諸章目列於後云

乾陵述聖記

朕聞陽耀陰凝混元所以

闕二字

天覆地

闕一字

高宗見之矣

粵若稽古帝唐神

闕

俱爲薶草之場唼唼齊萌同變亂麻

之域高祖神堯皇帝晦電凝禎流虹降祉鍾昊穹之眷命

字闕三之闕二太宗文武聖皇帝資靈寶緯挺睿金英稟赤

帝於南宮闕地而殪封狝殲蝟結而殄鴟張疇野裂而阪

泉震白波靜而闕展臨明臺而養正坐衢室以居尊宵衣

兢若厲之懷盱食闕三之闕高宗大帝焉爰初在孕及乎

載誕見龍登寢其宵有夢象之符休闕大帝之懷紫翼錦

鱗與常有異排黼帷而莫懼依繡闕一而無闕二聖后曰

烏爲慈孝之鳥復是太陽之精天意若曰此兒其以愛闕

化方流初涉藝門生知自遠若砥金之含彩同瑩玉之開

闕不充行莫能正履衣未嘗解帶暨陰明落照柔範韜儀



闕埋璽於相思殿前因告天地明祇及山川羣望曰當璽

而立闕在庭分陝聿諧其望執金按道闕一宛闕一慕其

榮於是式降闕之計不謀同發一旦闕一收是知殷憂以

啟聖明多難以闕試之功文武斯極又嘗監和御藥手持

入進屬太闕以情職廢農基以觸圍驚仗天威震怒立命

斬之闕戈戰闕一戎夏克清獨有淚水虧風丸山阻順皇

赫斯怒闕戰之氣闕一居百步之中大帝莫能自安魂膽

飛闕而以遠涉之勞時有不豫令大帝總知軍國閒日闕

太宗命大帝承旨玉階即令敷暢闕猥太宗撫大帝頰而

言曰吾聞闕流闕集紫庭地含梧野之哀山起祚宮闕之

物豈余闕而闕哉侍臣銜涕敦勸扶而闕先忌則潛

泣累晨澤奉遺圈則凝哀永日因闕之鏡歟好生惡煞之

財成有截雨施雲行之惠沐浴闕其源而春賞秋罰

攀檻思聞逆耳之言瞽說狂詞闕煥乎天文架丹闕

而首出矣闕材兼運杖仁義以明威闕官貽後昆而

作範劉臺罷構姬沼弗營寶駟咸歸闕畜而闕皇之神

務焉想空谷以載懷望中林而式闕刑不怒而威不言而

信去罰寔由於一德勝殘無闕凝甘闕而湛夜瑞蕙薦

搖風之影祥

闕

萬騎

闕二

披月候於云峯轉星闥

闕

謀臣

若兩猛將如雲競獻九攻之能爭

闕

九天偏將暫動戎麾

俄清十角

闕

逍遙而訪道思窅眇以尋真或轉旆蕭關或

闕

已崩

闕三

貞

闕二

抱

闕一

烏而凝哀捧遺弓而

闕

仁況

又神聖文武並

闕一

謚今故因仍舊

闕

文

闕一

之詞英豈

能

闕一

聖海之遙源敘

闕

始

闕一

敬養允副因心近者

闕

字

遠之初塋兆

闕

自古聖皇咸遵菲葬穀林稽嶺唯聞簡

素

闕

因天造無待人功微將所習之書以示不忘

闕

而

字

符隱翠柏而成象石呈永固

闕

將歸上京崩訢穹旻志

期攀

闕

易

闕

一

茹荼之恨

闕

一

盡唯思贊述少慰抽摧但

闕

織錦迴文記

前秦苻堅時秦州刺史扶風竇滔妻蘇氏陳留令武功道  
質第三女也名蕙字若蘭識知精明儀容秀麗謙默自守  
不求顯揚行年十六歸於竇氏滔甚敬之然蘇性近於急  
頗傷嫉妬滔字連波右將軍子真之孫朗之第二子也風  
神秀偉該通經史允文允武時論高之苻堅委以心膂之  
任備歷顯職皆有政聞遷秦州刺史以忤旨謫戍燉煌會

堅寇晉襄陽慮有危逼藉滔才略乃拜安南將軍留鎮襄陽焉初滔有寵姬趙陽臺歌舞之妙無出其右滔置之別所蘇氏知之求而獲焉苦加捶辱滔深以爲憾陽臺又專形蘇氏之短諂毀交至滔益忿焉蘇氏時年二十一及滔將鎮襄陽邀其同往蘇氏忿之不與偕行滔遂攜陽臺之任斷其音問蘇氏悔恨自傷因織錦迴文五綵相宣瑩心耀目其錦縱橫八寸題詩二百餘首計八百餘言縱橫反覆皆成章句其文點畫無缺才情之妙超今邁古名曰璇璣圖然讀者不能盡通蘇氏笑而謂人曰徘徊宛轉自成

文章非我佳人莫之能解遂發蒼頭齋致襄陽焉滔省覽  
錦字感其妙絕因送陽臺之關中而具車徒盛禮邀迎蘇  
氏歸於漢南恩好愈重蘇氏著文詞五千餘言屬隋季喪  
亂文字散落追求不獲而錦字迴文盛見傳寫是近代閨  
怨之宗旨屬文士咸龜鏡焉朕聽政之暇留心墳典散帙  
之次偶見斯圖因述若蘭之才復美連波之悔過遂製此  
記聊以示將來也如意元年五月一日大周天冊金輪皇  
帝御製